



EDITORIAL

Panalipdan an katawhan kontra ha militarista nga daup ni Duterte ha Covid-19

HUL-OS NA NGA nahuman an ukoy-bubto han Bagong Hukbong Bayan (BHB). Tungod kay diniri an rehimen Duterte nga ig-undang an mga pangatake ha BHB ngan hatagan atensyon an pagresponde ha krisis han Covid-19, natikahugot an panginahanglan para ha BHB nga maglansar han mga opensiba kontra ha mga pinakaabusado ngan lanong nga elemento han AFP-PNP.

Mahugot nga naghasog ha ukoy-bubto an BHB. Aktibo la ini nga nagdependensa han kalugaringon atubangan han klaro nga pag-atake ngan paglanat han kaaway. Mas ginhatagan hini han atensyon an kampanya kontra ha Covid-19 agud buligan an masa ha buruhaton edukasyon, kalibsugan ngan sanitasyon, sugad liwat ha produksyon han pagkaon, buruhaton ekonomiya ngan konsolidasyon han mga organisasyon masa.

Samtang, labaw nga nagin madarahug an mga pitad han rehimen Duterte nga kunohay kontra ha pandemya. Utro nga ginpahilawig an militarista nga lockdown nga nagpatay ha panginabuhihan milyun-milyon. Gin-gagamit naman

ini han mga hakog-ha-gahum nga pulis ngan militar agud maltratohun an hinoman nga diri nasunod ha ira karuyagon. Ha Eastern Visayas, napartisipar an 8th Infantry Division-Philippine Army ha kontra-Covid nga kampanya agud tuban an mga ginpapintas nga operasyon kontra ha BHB ngan an militarisasyon ha kabaryuhan nga nagtutumuyo nga maniktik ngan gipiton an masa. Klaro nga diri ini epektibo tungod kay natikadamo gihapon an natatapnan ngan namamatay ha sakit ngan nadugngan pa an nagugutom tungod ha lockdown.

Buruhaton han BHB nga ig-undang an interes han masa. Ha takna han ira grabe nga pagkukuri, kinahanglan ipasilitar han BHB nga nakakarawat han katawhan an ayuda nga kinahanglan nira. Kadungan hini, kinahanglan panalipdan han BHB an kalugaringon ngan an katawhan kontra ha waray wantas nga pangatake ngan pangabuso han AFP-PNP. Kinahanglan hini buligan an masa nga ibuksas an pangabuso ilarum han lockdown ngan pagbaydon an mga naghihimo hini. ■

Ukoy-bubto han BHB, nahuman na

GIN-ANUNSYO HAN PARTIDO Komunista ng Pilipinas (PKP) nga diri na hini utro nga pahihilawigon an ukoy-bubto han Bagong Hukbong Bayan kontra ha mga armado nga ahente han rehimen Duterte, nga hul-os na nga nahuman hadton Abril 30 alas-11:59 han gab-i.

Sigon ha PKP, ha luyo han mga panawagan para ha usa nga "pankalibutan nga ukoy-bubto," kinahanglan na humanon han BHB an ukoy-bubto hini tungod kay waray man umundang an mga operasyon kontrainsurhensiya han Armed Forces of the Philippines bisan pa nag-anunsyo hi Duterte han ukoy-bubto hadton Marso 16.

Tikang Marso 16, nagdeploy an AFP han mga tropa ha maabot 396 nga barangay ha 148 nga bungto ha bug-os nga nasud. Naglansar liwat ini hin diri mamenos ha 36 nga reyd kontra ha BHB ha 23 nga probinsya, kalakip an Northern Samar ngan Samar. Nailista an 11 nga iba pa nga agway tungod ha waray hunong nga operasyon kombat han militar.

Ginsaludaran han PKP an BHB ha pagsunod hini ha unilateral nga ukoy-bubto han Komite Sentral ngan ha magdinaugon nga pagdependensa ha kalugaringon ngan ha masa kontra ha mga opensiba han AFP. Nahiagum an AFP han 56 nga kaswalti, kun diin 31 an naptay. Maabot ha 18 nga Pula nga mangaraway naman an napatay samtang walo an nasamaran.

Iginmando han PKP ha ngatanan nga yunit han BHB nga "magbag-o tikang ha dependensa nga posisyon ngadto ha opensiba nga posisyon" agud makaglansar han mga taktikal nga opensiba labina

"Ukoy-bubto..." sundan ha paypay 2

Kampanya kontrainsurhensiya han 8th ID, padayon

WARAY IG-UNDANG NGAN ginpapintas pa han 8th Infantry Division an kampanya kontrainsurhensiya ha bug-os nga Eastern Visayas kahuman han ukoy-bubto han militar ngan samtang padayon an krisis han Covid-19.

Ha Northern Samar, padayon nga nag-ooperasyon an mga elemento han 20th IB ha tahub han pagserbe komo "pwera panseguridad" han mga upisyal han barangay ngan trabahador pankalibsugan, ngan ha mga tsekpoynt agud kontrolon an gios ha mga mayor nga kalsadahan. Hini nga panahon ginreyd han mga tropa han 20th IB an usa nga base han Bagong Hukbong Bayan hirani ha Brgy. P. Rebadulla, Catubig hadton Abril 23. Antes hini, naghimo hin haros usa kasemana nga operasyon kombat an sumobra-kumulang 120 nga tropa ha tulo nga baryo ha Silvino Lobos ngan Las Navas, diin tulo kabises nga aktibo nga nagdependa an BHB. Ginbibinantayan liwat han 20th IB an perimetro han Lapinig, nga aada ha tubtuban han Northern ngan Eastern Samar.


Ha Leyte ngan Southern Leyte, mahugot nga nagpapatuman han *curfew* an mga elemento han Civil-

Military Operations Team han 14th Infantry Battalion. Naghihimo liwat ini han "operasyon loudspeaker" o "Budjong" agud pugngan nga gumawas han balay an mga residente. Nakadeploy hadto an 14th IB ha Eastern Samar.

Mga elemento na han 78th IB an nakapakat ha mga bungto han Canavid, Dolores ngan Oras ha Eastern Samar, kun diin naghihimo liwat hira han "Budjong" ngan kampanya kontrainsurhensiya. Ha Western Samar, nag-ooperasyon an mga tim han Retooled Community Support Program (RCSP) han 46th IB ha mga baryo han Antol, Caamlongan, Hindang ngan Daligan ha Calbiga, ngan ha Barangay Layo ha Pinabacdao hini nga katapusan nga semana han Abril. Luyo han ukoy-bubto, waray hunong an operasyon han 46th IB ha mga nasering nga bungto.

Diri makatawo nga mga operasyon militar

Ginrarakudako han 8th ID nga nahimo nira nga "magdaug" kontra ha Covid-19 ngan kontra ha BHB. Kundi sigon ha Partido Komunista ng Pilipinas, diri makatawo an mga magastos nga operasyon han militar samtang grabe nga krisis ha kalibsugan ngan ekonomiya an gin-aantos han katawhan. Ha tantiya han PKP, nagpagios an AFP han sumobra-



"Ukoy-bubto...", "tikang ha paypay 1

kontra ha mga pinakalanong nga parupanalapas han tawhanon nga katungod ha AFP, PNP, CAFGU ngan iba pa nga armado nga grupo han rehimen Duterte. Ginpahinumduman han PKP an BHB nga seguruhon an sikreto nga paggios agud pakyason an mga larang nga pag-atake han AFP.

Kinahanglan liwat makigbuligay an BHB ngan mga rebolusyunaryo nga pwera ha ngatanan nga institusyon, bisan ha mga ahensiya han reaksyunaryo nga gubyrno, nga karuyag magpaabot han bulig ha katawhan nga grabe nga naapektuhan an pakabuhi. Ginseguro han BHB an ira katalwasan ngan gin-aghat hira nga did-an an tanyag han AFP nga magserbe komo pwera panseguridad.

Kinahanglan liwat igpadayon han BHB an buruhaton medikal, pankalibsugan ngan pagbulig ha masa nga maglansar han kampanya para ha reporma nga agraryo ngan pagpauswag han produksyon. Kinahanglan liwat konsolidahon ngan aghaton an mga organisasyon masa nga suportahan an gerra han katawhan, ngan dugang nga pakusgon an BHB. ■

kumulang 11,500 nga pankombat nga tropa ha bug-os nga nasud ha panahon han ukoy-bubto. Posible nga gumastos an militar han maabot P70 milyon para maglansar han kada usa nga 10 kaadlaw nga operasyon. Narunapulo kamilyon kapisos liwat an gin-gastos hini para ha mga paniniktik gamit an *drone* ngan panmomba gamit an mga *fighter jet* ngan *attack helicopter*.

Samtang nag-ooperasyon ha mga baryo, dirudiretso gihapon an panalapas han AFP ha tawhanon nga katungod, sugad han *Red-tagging*, pwersado nga pagpasurrender, ngan pag-okupar han mga sibilyan nga istruktura. Ginpupugngan liwat an BHB nga mabuligan an masa nga grabe nga naapektuhan han *lockdown* ngan pagluros han ekonomiya. ■